

BETICO CROES TABATA UN PERSONA HOPI CONOCI DEN COMUNIDAD



-- Sr. Gilberto Francois Croes, cariñosamente yama Betico, a nace dia 25 di Januari 1938. E ta yiu di Mimita y Panchico Croes, personanan hopi conoci gen e bario di Sta. Cruz.

Desde hoben Betico tabata hopi activo y a dedica na yuda e temponan ey den Misa na Sta. Cruz.

Pa school e tabata un bon alumno y tabata yuda den organiza actividadnan pa su colegianonan.

Despues di a termina su estudio basico el a bay te 3 año di H.B.S. Cu hopi dolor y sacrificio e mester a bandona su isla natal pa sigui studia na Hulanda, na unda

el a termina su estudio como maestro cu "Hoofdakte". Durante e añanan cu e tabata na Hulanda el a yuda masha hopi den organizacionnan Antiyano, trahando pa estudiantenan Antiyano/Arubiano.

Despues cu el a termina su estudio el a regresa Aruba y a bin dedica su mes den educacion di su pueblo. Aki na Aruba, principalmente den e pueblo di Sta. Cruz, Betico tabata goza di hopi popularidad y tabata activo ariba diferente terenonan social.

E tabata un persona cu hopi biaha tabata cla pa duna un man ariba cualquier tereno. E tabata ejemplar y tabata pasa su temponan liber trahando pa e juventud di Aruba. Apesar di su ocupacionnan el a logra obtene diplomanan L.O. Spaans y L.O. Handelskennis.

Betico na un edad joven a drenta enlace matrimonialcu Glenda Croes. For di e matrimonio aki a nace 4 yiu Guisette, Glenbert, Junior y Glendeline. Jovenan cu awe sigur e lo ta orguyoso di nan, especialmente Glenbert cu actualmente ta ocupando un puesto importante como representante di Gobierno, esta den funcion di Minister.

MAÑAN TA DIA NACIONAL

**Pa conmemora fecha
natal di Betico Croes.**

Mañan Aruba ta recorda e di 58 año di fecha natal di nos gran luchador Sr. Betico Croes (q.e.p.d).

Ya pa varios año caba e dia aki ta worde considera como un dia nacional y durante añanan el a bira un dia di celebracion caminda tin hopi actividadnan tumando lugar.

Pero e importante di e fecha aki tambe ta pa refleha tambe ariba un persona cu a lucha hopi pa su pueblo, cu tin un historia largo su tras y cu ta masha poco e jovenan di awendia sa kende berdaderamente ta e persona aki y pakico realmente ta haya un dia liber na number di e persona aki.

Ariba e dia aki tambe mester bini mas informacionnan mas lecturanan y mas programanan pa asina e pueblo por sa algo mas di nos antepasadonan cu a lucha pa e pueblo.

Cu e informacionnan aki e futuro generacionnan tambe ta haya mas aprecio pa locual cu ta di nos, mescos ta cu jovenan di otro paisnan cu for di chiquito ta papia di historia di nan pais y di nan hendenan.

Pa su senciyez BETICO A GANA CONFIANZA DI E PUEBLO

-- *Betico a drenta politica activamente na año 1967 como candidato ariba lista di A.V.P.*

Apesar cu e tabata un novato den politica, Pueblo di Aruba a mire como un joven sincero y decisivo y a respalde cu nada menos cu 1045 votos pa su prome eleccion y asina tambe Betico a bira e politico mas joven cu mas popularidad di e tempo ey y a haya e puesto di Diputado na Juli

1967 puesto cu el a ocupa te cu 2 di September 1970.

Como Diputado el a haci un tremendo labor, pero especialmente pa su senciyez pa cu su pueblo a haci cu e pueblo a haya un enorme confianza den su persona.

Esaki a keda demostra tambe durante e eleccion di Staten na año 1969, durante cual Betico a obtene nada menos cu 1999 votos, casi dobbel di e votonan di año 1967.

Y asina tambe el a keda coy e confianza di e pueblo caminda cu na año 1971 el a lanta su mes un partido M.E.P. y ta un di e "votegetter" mas grandi den historia politica di Aruba.

CALENDARIO DI EVENTONAN RELACIONA CU DIA DI BETICO

(ORANJESTAD(AAN)) Mañan Aruba lo tin un dia nacional en coneccion cu fecha di nacemento di Betico Croes. Relaciona cu esaki lo tin varios actividadnan ariba nos isla. Siguiyemente DIARIO a copia un paar di eventonan pa asina duna su lectornan un bista mas facil unda nan por pasa un dia placentero hunto cu nan famia.

NOS BETICO

Aruba ta un pais awor
Un soño a bira realidad
Grandi ta nos amor
Pa Aruba su libertad

Danki na nos Betico
Un danki di pueblo en general
Su bida tabata cortico
Pero den historia e ta inmortal

Y awor na unda nos ta bay?
Nos Betico no ta na bida mas
Cu e bandera den su man nos Betico a cay
Pero el a pidi nos pa e lucha no muri jamas

Arubianonan stima bo rais
Mantene bo identidad
Lucha pa bo pais
Cu orguyo y dignidad

Manera nos Betico

Norman Thijsen, 25 Januari 1995

